



ILLUSTRISSIMO
ET NOBILI VIRO

D. D. JOSEPHO

LIEUTAUD,

IN SACRO CONSISTORIO
REGIS CONSILIARIO,
ARCHIATRORUM COMITI,
Saluberrimæ Facultatis Medicinæ

Parisiensis Doctori-Regenti,
Regiæ Scientiarum Academiæ Parisiensis Socio, &c. &c.

In perpetuum grati animi & reverentiæ Monumentum
Offert, Dicat & Consecrat

Devinctissimus & obsequentissimus

Joannes - Renatus SIGAULT,

Saluberrimæ Facultatis Parisiensis Medicus



QUÆSTIO MEDICA,
QUOD LIBETARIIS DISPUTATIONIBUS;
manè discutienda in Scholis Medicorum, die Jovis decimâ sextâ mensis
Februarii, anno Domini M. DCC. LXXV.

M. THOMAS LE TENNEUR,
Doctore Medico, Præside.

An à conceptu ad puerperium genus nervosum sensibilus?

I.



UM nervi in corpore sensus organa sint, à vario illorum contextu variâque dispositione præcipuè pendet sensibilitas. Hæc autem major aut minor comperitur, prout illi facilius aut difficilius vel ab objectis externis, vel ab ipsius animæ affectibus commoventur. Levissimum enim est, quod in modo sentiendi discrimen oritur à diverso spirituum animalium influxu; dum maximum importat diversa fibrarum nervearum vibratilitas. Quæ vis, nervo insita & à partium gracilitate, tensione & elasticitate unâ dependens, foeminis major quàm viris obtigit. Hinc generatim foeminæ acutiùs sentiunt. In viris quippè tum propter partium fabricam, tum propter vitæ genus magis exercitatum, succumque nutritium uberius; constantius, firmitusque appositum, fibræ crassiores robustioresque ut plurimum observantur; consilique ex iis nervi, minùs indè mobiles, non de causis tam levibus immutationes subeunt. In mulieribus verò tum à naturæ insituito, tum ab educatione, & vivendi normâ nervi fibris magis gracilibus & delicatulis constant; indè vel levissimo stimulo agitantur, & minimâ accedente causâ majorem tensionis gradum acquirentes magis adhuc vibratiles fiunt. Sic faciliè eos afficiunt, movent, & perturbant tum leves externorum objectorum impressiones, tum plurima animi pathemata, quibus viriles nervi inconcussi resisterent: sic foeminæ ut plurimum tactu visu, olfactu, gustu & auditu tam exquisito pollent: sic, dum moerent, irascuntur, amant, expaveſcunt, &c. tantas mutationes & sæpè tam tristes turbas in corpore



experiuntur : sic tandè in illis major , quàm in viris , ad syncopem variosque spasmodicos affectus proclivitas. Ut verò à se invicem diversæ mulieres pro diversâ constitutione , ità eadem foemina , pro diversis temporibus & circumstantiis , sensibilitatis gradu à se ipsâ differt ; nec malè hîc asserimus in fæminis à conceptu ad puerperium genus nervosum sensibilius esse.

I I.

PLURIMIS de causis sensibilitas intendi & crescere potest. Causæ illæ morales aut physicæ sunt. 1°. Quidem quotiès aliqua affectio insolita mentem occupat , angit , aut recreat , statim nova quædam in fluido nerveo agitatio oritur , quæ nervos vibratiliores ideòque minimâ occasione ad sensum promptiores reddit. Quid & quantum morales causæ in nervos valeant , exempla passim occurrunt. Sic quotidie videre est quales in nervos , quales illorum ope in totum corpus ira , terror , odium , amor , gaudium , mæstitia , spes , anxietas , effectus producant. 2°. Quod ad causas physicas pertinet , numero infinitæ sunt , sed inter præcipuas annumerantur sanguis abundantior per vasa ampliora vectus , proindèque nervos magis distendens , & solito majorem spirituum animalium copiam suppeditans ; sanguinis motus acceleratio & indè per nervos rapidior spirituum distributio ; præsertim verò hujus aut illius in corpore partis titillatio , vellicatio , erosio , compressio , distensio , inflammatio , &c. Undè ob mirabilem omnium nervorum inter se consensum , toti nervosæ compagi major tensionis & ideò vibratilitatis gradus communicatur. Quid illæ causæ possint , inter innumera alia , mirè probant dentitionis phænomena , paronychia symptomata , & lipothymia , capitis dolores , variæque convulsiones à ventriculi & intestinorum irritatione ortum ducentes.

His positis prædictas majoris sensibilitatis causas à conceptu ad puerperium in foeminis adesse demonstrandum venit.

I I I.

1°. **C**AUSÆ quidem morales adsunt. Statim atque etenim aurâ feminali fecundata mulier se concepisse novit aut suspicatur , diversis ideis & affectionibus illius mens agitur. Modò prolis nascituræ dulcem imaginem sibi fingere amat , & maternitatis delicias jam prægustat : modò de fragili tenelli embryonis vitâ secum mœrens cogitat , & ne immaturus pereat tacite contremiscit : modò pericula sibi ipsi imminentia pavida in mentem revocat , sæpèque ea sibi sollicita amplificat. Crescunt in ipso partu metus & anxietas. Succedunt post partum gaudium , sobolis amor , & de illâ multæ sollicitudines. His autem omnibus dum anima afficitur , spiritus animales commoventur , agitantur , motuque suo quemdam nervis insolitum tonum communicant , indè eorum vibratilitatem augment , & sic sensibiliores eos efficiunt.

2°. Physicas etiam causas tunc adesse patet. 1°. Nempe sanguis , solito per uterum effluxu suspensus , corporis vasa omnia magis replet & distendit , sicque novum tensionis gradum nervis addit. 2°. Sanguine speciatim ad cerebrum res fluo spiritus

animales copiosius generantur, & in nervis toni intensioris majorisque vibratilitatis nova causa sunt. 3°. Sanguinis motus sive ob plethoram, sive ob quemdam uteri laborem tunc acceleratur, spiritusque animales non abundantius tantum, sed rapidius etiam distribuuntur; motus autem acceleratio, & rapidior spirituum distributio necessarii ejusdem in nervos effectus novae adhuc causae habentur. 4°. Praecipue verò sensibilitatis augmentum ab uteri statu pendet, qui primis nempe à conceptu temporibus feminis retenti, sese expandentis, calore titillatur: amico stimulo gaudens leviter convellitur, & ex infoluit illius impressione continuo ad insolitos motus sollicitatur. Deinde toto gestationis tempore, dum foetus volumen magis ac magis crescit, illius mole & motibus nervi uterini indefinenter comprimuntur, distenduntur, omni modo lacescunt. Neminem latet quantae sint in partu compressiones, contusiones, distensiones, saepe etiam dilacerationes, &c. Tandem in puerperio nervi jam tantopere irritati, tumefacti nunc, tensi & quandoque inflammatis mammis magis convelluntur.

Cum autem propter varias nervorum anastomoses inter uterum & omnes corporis partes maxima sit relatio, mirabilisque consensus, quandiu sic uterini nervi stimulantur atque lacescunt, tandiu ceteri omnes totius corporis nervi quodam sympathico crethismo tenduntur, & ob tonum inde intensiorem magis vibratiles ideòque magis sensibiles evadunt. Quod verò speciatim puerperium spectat, faciliè intelligitur in quantos effectus tunc mammae tumentes, tensae, inflammatae, majoris sensibilitatis novum centrum constituent.

I V.

QUOD è praedictarum causarum existentia sensibilitatis augmentum faciliè concluditur, illud quotidiana experientia comprobat, & conceptus, gestationis, partus, puerperii phaenomena rem demonstrant. In conceptu etenim solito major voluptas, dentium stridor, articularum convulsio, torpor uterum, quin imò ceteras corporis partes occupans, insignis & subita mutatio mulieribus percepta, dolor ad umbilicum, quaedam ventris turbatio, circa ischiadicam regionem titillatio, nonnunquam syncope, totidem sunt sensibilitatis auctae effectus & indicia. In gestatione idem dicendum est de nausea, vomitibus, cordis palpitatione, vertiginibus, animi deliquiis, convulsionibus, erraticis partium doloribus, vigiliis, dentium cruciatibus, hemicrania, tunc frequentissimis. Idem etiam de horripilatione, spasmodicis succussionibus, ipsis etiam aliquando violentis convulsionibus partum comitantibus intelligendum est. In puerperio tandem undenam, nisi ob sensibilitatis excessum, vel levissimâ luce ingratè perstringitur oculorum acies? Undenam vel minimo strepitu laeditur auditus, offensumque caput dolet? Cur odores quilibet naribus tam insensibiliter graves lipothymias aut funestas convulsiones producant? Cur puerperae ob minimos circa cubile motus, & ipsos in cubiculo astantium gressus, ingratè afficiuntur? Cur tandem à levissimo animi pathemate syncope aut spasmi tunc adeò frequenter oriuntur?

Aliundè quemadmodum in foeminis, praedictis temporibus, morborum species, ita regiminis & therapeuticae genus illis conveniens majorem sensibilitatis gradum manifestè

inducant; sic profectò non illis victus levis, potus tenuis, blanda corporis & mentis quies, somnus placidus; non lenientium & temperantium usus, tam salutare essent; neque illis contraria tantoperè nocerent, nisi in iis locus esset temperandi, relaxandi, proindeque tensionem & ideò sensibilitatem minuendi.

V.

EX præmissis conclusio patet; sed quem ad finem, inquires, foeminae jam tot & tantis ex sua conditione miseriis obnoxiae, novis adhuc, ab exquisitiore sensibilitate pendentibus, in gestatione, partu & puerperio obsiderentur? Nihil profectò natura sine consilio, sine fine disponit. Hic porro illius duplex finis esse videtur, moralis & physicus, sive 1^o. ut mulieris anima exsuscitaretur, materque sensibilibus de prole gerenda, in lucem edenda, educanda, conservanda efficacius curaret: 2^o. ut ad partum faustum & felicem vires præpararentur. Pleraque nempe mulieres tanto operi impares forent & immensos uteri muscutorumque abdominalium conatus minimè ferrent, nisi nervi, a conceptu sensibilitate audaci, ad tantum laborem promptiores & aptiores redditi fuissent. Contrà verò juvante illo sensibilitatis augmento, mulier vel debilissima, dum parturit, herculeam sanèque stupendam virtutem exhibet. At passim obviae sunt praeognantes, parturientes & puerperae, in quibus sensibilitas minima apparet. Esto quidem quod sensibilitas in omnibus non aequa sit: hæc quippè pro variâ temperie, diverso regimine, diversisque locis & circumstantiis differt. Quinimò non nullae reperiundae sunt mulieres, ob phlegmaticam frigidamque constitutionem, laxamque texturam, ferè sensus expertes. Sed sufficit, si in hisce mulieribus sensibilitas, quaecunque sit, prædictis temporibus tantisper augeatur.

Ergò à conceptu ad puerperium genus nervosum sensibilibus.

DOMINI DOCTORES DISPUTATURI.

M. Hugo GAUTHIER, Consiliarius Regis Medicus.

M. Simon VACHER, Regis exercituum in Insula Corsica Medicus Primarius.

M. Carolus Ludovicus LIGER; Consiliarius Medicus Regis ordinarius in urbe & Comitatu Altiphonensi.

M. Ludovicus Gilbertus BORYOT DE JONCHERES.

M. Cosma-Augustinus LEZURIER.

M. Joannes Stephanus GUYTARD, Regiarum Academiae Parisiensis, Rupellensis, Florentinae & Stokolmiensis Socius, Censor Regius & Historiae naturalis Musaei serenissimi Dacici Aurelianensium Custos.

M. Carolus SALLIN.

M. Nicolaus JEANROY, Bibliothecae Facultatis Praefectus, Regii Medicorum Collegii Nanceianorum Socius honorarius

M. Natalis-Maria DE GEVI-GLAND, Regiorum in Germaniam Ducum & Militum Nosocomiorum nuper Medicus

Proponebat Parisiis JOANNES - RENATUS SIGAULT, Divionæus, Doctor Medicus Andegavensis, nec-non Saluberrimae Facultatis Medicinae Parisiensis Baccalaureus, Theos Autor. A. R. S. H. 1775. à sextâ ad meridiem

Typis QUILLAU, Saluberrimae Facultatis Medicinae Typographi.